



KABINET DIREKTORA

Broj: 01-18-\_\_\_\_\_/05

Datum: \_\_\_\_ 2005. godine

Na osnovu člana 7. stav 1. i 2. i člana 8. stav 1. Zakona o sistemu indirektnog oporezivanja u Bosni i Hercegovini ("Službeni glasnik BiH", broj 44/03 i 52/04), člana 61. stav 2. Zakona o upravi ("Službeni glasnik BiH", broj 32/02) i člana 31. i 70. stav 2. Zakona o porezu na dodatu vrijednost ("Službeni glasnik BiH", broj 9/05 i 35/05), direktor Uprave za indirektno oporezivanje d o n o s i

## U P U T S T V O

### O POREZU NA DODATU VRIJEDNOST PRI UVOZU

#### GLAVA I - OPŠTE ODREDBE

##### Član 1. (Predmet)

(1) Ovom uputstvom bliže se propisuje obračun, naplata i prikupljanje poreza na dodatu vrijednost (u daljem tekstu: PDV) pri uvozu dobara u skladu sa odredbama Zakona o porezu na dodatu vrijednost ("Službeni glasnik BiH", broj: 9/05 i 35/05, u daljem tekstu: Zakon).

#### GLAVA II - PROMET DOBRIMA, PORESKA OSNOVICA I PORESKI OBVEZNIK

##### Član 2. (Promet dobrima)

Pri uvozu dobara, koja se pri ulasku na carinsko područje Bosne i Hercegovine ( u daljem tekstu: BiH) stavljaju u carinski postupak provoza ili carinski postupak privremenog uvoza uz potpuno oslobađanje, obračun, naplata i uplata PDV-a nastaje kada se ta dobra više ne nalaze pod tim postupcima.

##### Član 3. (Poreski obveznik)

Osobu odgovornu za plaćanje PDV-a u slučaju uvoza predstavlja dužnik utvrđen u skladu sa carinskim propisima.

**Član 4.**  
(Poreska osnovica)

(1) Poresku osnovicu kod uvoza dobara u BiH će predstavljati vrijednost dobara utvrđena u skladu sa carinskim propisima, a što se odnosi i na dobra koja se stavljaju u carinski postupak vanjske obrade.

(2) Osnovica iz stava (1) ovog člana će obuhvatiti i:

- a) akcize, uvozne dažbine kao i druge javne prihode, osim PDV-a;
- b) bilo koje zavisne troškove (kao što su npr. provizije, troškovi pakovanja, prevoza, osiguranja i drugo), koji nastaju nakon uvoza dobara do prvog odredišta unutar BiH:
  - 1) dok se odnose na troškove od geografske tačke gdje dobra ulaze na carinsko područje BiH pa do prvog odredišta unutar BiH, kao što je navedeno na otpremnici ili drugom dokumentu na osnovu kojeg se dobra uvoze;
  - 2) pod uslovom da troškove iz alineje 1) ove tačke prodavac naplaćuje od kupca ili klijenta.

(3) Zavisni troškovi iz stava (2) tačke b) ovog člana će takođe biti uključeni u poresku osnovicu kada nasatnu zbog prevoza do drugog odredišta u BiH, ukoliko je to mjesto poznato pri obračunu i naplati PDV -a pri uvozu.

(4) U skladu sa članom 22. Pravilnika o primjeni Zakona o porezu na dodatu vrijednost, u poresku osnovicu iz stava (1) ovog člana, neće se uključivati naknade za administrativne takse i naknade koje se inspeksijskim i drugim javnim organima koji obavljaju izvršnu vlast plaćaju za izdavanje uvozne dozvole, uvjerenja i slično, osim naknada i dažbina koje se plaćaju kod carinjenja.

**GLAVA III - OSLOBADANJA OD PDV, OBRAČUN I PAĆANJE PDV**

**Član 5.**  
(Oslobađanja od PDV-a)

(1) Oslobađanja od PDV-a koja se baziraju na:

- a) članu 26. tačka 1. Zakona se odobravaju samo ukoliko je poreski obveznik, prije uvoza, pribavio potvrdu od Uprave za indirektno oporezivanje-Sektora za poreze da je oslobađanje u skladu sa članom 24. ili 25. Zakona;
- b) članu 26. tačka 4. Zakona se primjenjuju samo kod dobara koja su ponovo uvezena u stanju u kojem su izvezena, pod uslovom da su ta dobra oslobođena od plaćanja uvoznih dažbina u skladu sa članom 177. do 179. Zakona o carinskoj politici Bosne i Hercegovine;
- c) članu 26. tačka 6. Zakona se primjenjuju kod uvoza proizvoda pomorskog ribarenja i drugih proizvoda izvađenih iz mora, ukoliko su oslobođeni od plaćanja uvoznih dažbina kod stavljanja u slobodan promet u skladu sa članom 180. Zakona o carinskoj politici Bosne i Hercegovine;
- d) članu 30. stav 1. do 3. Zakona se primjenjuju samo na dobra ako se nalaze:
  - 1) pod privremenim smještajem;
  - 2) u slobodnoj zoni ili slobodnom skladištu;
  - 3) pod carinskim postupkom skladištenja ili unutrašnje obrade (sistem obustave plaćanja).

(2) Ukoliko oslobađanje iz stava (1) ovog člana prestane, iznos PDV-a, koji će biti obračunat, naplaćen i plaćen, bi trebao biti jednak iznosu koji bi bio obračunat, naplaćen i plaćen da je promet dobrima bio oporeziv pri njihovom uvozu u BiH i unutar područja BiH uz dodatak vrijednosti oslobođenih izvršenih usluga vezanih za dobra prije nego što je oslobađanje prestalo.

(3) Poresku osnovicu za dobra kojima se trgovalo dok su bila predmet oslobađanja predstavlja posljednja trgovačka vrijednost dodata vrijednosti svih takvih pruženih usluga oslobođenih od plaćanja vezanih za dobra prije nego što je oslobađanje prestalo.

**Član 6.**  
(Plaćanje poreza)

(1) Ukoliko Uprava za indirektno oporezivanje zahtjeva polaganje garancije u cilju obezbjeđenja plaćanja carinskog duga, ta garancija će također obuhvatiti bilo koji iznos PDV duga, koji bi mogao nastati.

(2) Kada se carinske prijave sačinjavaju u pismenom obliku ili korištenjem tehnike obrade podataka PDV se obračunava, naplaćuje i plaća prema šiframa carinskih postupka ("Obračun, plaćnje i naplata PDV-a prema šiframa carinskih postupaka - šifre koje se unose u prvu potpodjelu polja 37 carinske prijave") kako je navedeno u Prilogu 1 ovog uputstva.

(3) Kada se carinske prijave sačinjavaju u pismenom obliku ili korištenjem tehnike obrade podataka, oslobađanja od PDV-a zasnovana na članu 26. Zakona, će biti zahtjevana od strane poreznog obveznika unošenjem u drugu potpodjelu polja 37 carinske prijave jedne od šifri iz Priloga 2 ovog uputstva ("Oslobađanja od PDV-a na osnovu člana 26. Zakona o porez na dodatu vrijednost (ZoPD) - šifre koje se unose u drugu potpodjelu polja 37 carinske prijave").

**GLAVA IV - ZAVRŠNE ODREDBE**

**Član 7.**  
(Sastavni dio i stupanje na snagu)

- (1) Sastavni dio ovog uputstva čine Prilog 1 i Prilog 2 iz člana 6. stav (2) i (3) ovog uputstva.
- (2) Ovo Uputstvo stupa na snagu danom donošenja, a primjenjivaće se od 01.01.2006. godine.
- (3) Ovo uputstvo biće objavljeno na Web stranici Uprave za indirektno oporezivanje.